

西  
堂  
文  
集

西堂雜組三集

卷八

長洲尤 侗悔菴謨

誄

四首

丁夫子誄

并序

康熙十年歲次辛亥五月四日 皇尚中憲大夫陝西  
榆林兵備道按察司副使日照丁右海夫子捐館舍春  
秋七十越十一月而大葬嗚呼哀哉侗遠隔千里未聞  
訃音執紼之禮闕焉壬子九月大世兄來公黃門至吳  
下方擬設位而弔明發遂行而侗適遭先君子之喪匍  
匍苦塊弗克操管迨癸丑八月黃門自武林返棹則服

關矣閔予小子其受知于師門者甚至而獲交于黃門  
兄弟者甚久心喪三年可無一言乎于是追念舊恩永  
懷世德恭製短誄用表素旒雖未能揚鴻修于萬一亦  
以盡區區之誠云爾其辭曰

維師尚父實啓丁公爰建青社世家于東易道在寬春  
秋在恭固爲公望鴻亦儒宗皇皇夫子挺生海曲六藝  
孔思五經邊腹策名南宮校書天祿夕拜瑣闥履素忠  
篤興朝定鼎飲馬江南首咨良牧姑蘇解嚴暫違蒲  
席竭駕熊驂戎車慢懷燕寢垂簾襦袴吾人膏雨吾土  
戢我干戈藝我稷黍穀我士女飲食歌舞訓我子弟絃

誦笑語 璽書褒勞載殿大邦擁旄杖節填撫廬江平  
反岸獄弭定封疆文武爲憲來宣朔方 帝曰往哉公  
曰歸止旣賦遂初欣奔故里東山絲竹午橋杖履以燕  
賓客以貽孫子厥子維何婉婉九龍元方繼武橐筆侍  
中仲旣鳴鳳季亦漸鴻餘子交秀玉樹青蔥厥孫維何  
二十未艾觸目琳琅翹首冠帶玉座蟬聯于門高大堂  
上稱觴綵衣羅拜我公通德師表一鄉黃髮兒齒靈壽  
相羊天錫五福攸好康強云何不弔頽壤山梁嗚呼哀  
哉 朝廷咨嗟不憖一老鄉黨號咷如喪妣考不杵不  
歌素車滿道哭來白鶴葬致大鳥侗自弱歲謬辱深知

題以國士教之誨之官衙樺燭甲乙文辭諸郎玉立結  
好墳篋疇歲使來遠貽尺一手墨淋浪如照顏色方占  
視履俄驚易簣立雪無門吟風何日樂樂棘人庭闈邁  
變雞骨支牀每懷香瓣白雲邈然龍門不見靡瞻靡依  
泣涕如霰哲人往矣生榮死哀莊遺五柳庭列三槐身  
騎箕尾名勒瓊臺令威千歲化鶴歸來嗚呼哀哉

徐太夫人誄

代

維康熙十有五年十一月七日 皇清誥封徐太母顧  
太夫人以疾卒于崑山里第春秋六十有一嗚呼哀哉  
時太夫人仲子翰林院編修秉義方請急歸暨幼子亮

采獲奉哈斂伯子右春坊右贊善乾學叔子翰林院掌  
院學士禮部侍郎元文俱官京師聞訃設位朝夕哭至  
小除日奔喪出都某以年家子從諸大夫後唁之苦次  
旣陳絮酒操文以祭太夫人而吾鄉先生同里親友將  
有合奠復寓書命作誄詞以述太夫人之德某不敢辭  
敬拜手稽首而爲之誄嗚呼哀哉蓋聞諸語云丈夫之  
德表于事行婦人之德非誄不顯稽古列女史不勝書  
惟德惟才兼茲殆鮮然而少君清節猶挽鹿車德耀高  
風祇齊鴻案慧如道韞未御鸞書秀比令嫺莫施象服  
豈非淑儀易勉景命難邀百祥無並降之方萬福罕攸

同之遇乎若太夫人者毓自名閨歸于華閭家積善慶  
躬荷天休三索而台鼎斯成九命而王章載錫子孫  
不億俾熾而昌壽考維祺式歌且舞雖旣醉五福未罄  
形容天保九如豈申頌禱見者驚其絕盛羨其殊榮歎  
其無疆無期疑其何修何飾不知太夫人夙興夜寐左  
攜右持佐君子以開有家啓後人而顯當世閔斯勤斯  
美矣善矣非甚盛德兼厥宏才未有受報若斯之隆者  
也用是累其懿行書之彤管託于素旗使百代內則有  
所憲焉其辭曰

猗與玉峰比象瑤崑列仙所宅金母常尊梯幾戴勝參

服元根降爲女士作式朱門家傳武陵代有達者結秀  
翰林承芳司馬夫人房中季女牖下窈窕依風徽音嗣  
雅嬪于東海閨閣相望夫子人豪意氣拍張以韋和弦  
用柔濟剛婉婉巾櫛調劑壺漿生世不諧遭家多難黽  
勉有無彌縫憂患外禦強梁內協親串風雨漂搖綢繆  
乃見豈無黃金所愛一經雖有白璧不如令名朝考夕  
庀日邁月征教誨爾子玉女于成子有詩書是訓是迪  
子有賓客式飲式食允熊匪茶截髫寧恤養成三鳳摩  
空六融健菴駿發天馬高馳博雅汲古經權濟時翊贊  
青宮華實交資母曰勗哉汝善訓辭果亭蘊藉四時



氣備理學有源道心無悔初入承明難進易退母曰勗  
哉汝敬有位立齋弘遠淵岳爲懷納忠講幄擣藻瀛臺  
廣開東閣樂育英才母曰勗哉汝思弼諧三公鼎足名  
震天下爲國求賢黼黻朝野里接鳴珂門施行馬太  
君處之謙謙如也每舉往訓安不忘危月盈則食器滿  
或敬受寵若驚見得必思千里貽誠凜如面規母之教  
矣子胥傲矣亦有庶孤言提其耳慈以旨甘授之圖史  
尚慎旃哉嗟予季子諸孫振振蘭玉繽紛跳虎蠟鳳驥  
子龍文南宮貴壻顧盼超羣青袍如草白馬如雲

天子賜之金符玉冊副笄六珈翟褕五色諸婦從之珮

環舄奕母也顧之云何不憚母祿彌崇母心彌淡績筐  
示勤練裙昭儉節以制度勞則思善處豐如約素風不  
變近周宗黨遠惠鄉廛爲粥飼饑解衣燠寒澤及昆蟲  
功在楚天塗謳路祝遐不萬年歲在龍蛇委蛻示疾寶  
婺掩芒金娥韜質玉棺朝下珠輪晚出高朗令終其旋  
元吉嗚呼哀哉北風雨雪涕泗滂沱紗窗徹瑟組帳停  
梭巷絕杵相戶滿些歌欒欒棘人哀哀蓼莪遙望靈輶  
紅雲遮護已謝迷津早登覺路衆香國來衆香國去白  
鶴青芝宛在丘墓嗚呼哀哉

王考功誄

并序

維康熙十二年癸丑七月二十二日吏部考功司員外郎新城王西樵先生以疾卒于里第春秋四十有八鄉人私謚曰節孝先生嗚呼哀哉公于乙巳歲省其弟今戶部阮亭明府于揚州官署予時適至遂定交焉嗣後不數相見然詩筒往來惓惓如也聞公之訃私爲之慟而未能束芻以弔越三年乙卯阮亭寓先生年譜命作誄詞予未有以應督之再三而終不能忘也今丁巳冬予復至揚州與諸君子遊輒談及二王事距先生歿蓋已五載而與先生別官署則十有三年矣登文選樓眺平山堂紅橋諸勝風景依然而其人已往然俯仰之間

先生之鬚眉杖履猶若髣髴在焉寒氷日落不勝思舊之感爲歔歔久之因思古人交友生則有贈答之什死則有祭挽之詞予旣老且病又以疎懶廢言不惟無以報戶部之命竊恐先生望我于九京也乃重取年譜閱之見先生之學問文章卓犖如此世必有傳之者獨其哭母而死孝行最烈君子表微可無述乎詠以章德爲不愧矣其辭曰

瑯琊之先肇基始興江左烏衣奕葉雲仍本支繼別載啓新城司徒司馬蟬聯簪纓賈誼降先生岐嶷異質弱不好弄殺核典籍賈誼升堂相如入室阿大中郎豈云傳

匹 王朝鼎建綱羅俊乂弱冠射策巍然高第宜直承  
明讀書中秘衆女謠詠蛾眉是棄諸公袞袞吾子高騫  
乞教東萊臯堂垂鱣海水汨沒遠望成連時醉番鉢富  
有詩篇旣入國子竊比昌黎左經右史朝鹽暮鑿迨銜  
詔命馳傳山西唐宮獻弔画壁留題爰陟銓曹允協衆  
望庶幾古人清通簡當出典文衡權奇善相曲高和寡  
動而得謗人憂北寺公咏西臺金經細字繡佛長齋諸  
天指掌萬物澄懷受福王母一笑歸來始也羈囚厥操  
拘幽旣也遠遊遂賦上浮星言南省至止揚州兄及弟  
矣塤箎唱酬昔從乃祖學書吳下今視爾季鳴琴官舍

三山踏春五湖消夏摩挲寶鼎流連玉笋二泉亭畔六  
橋堤邊酒旗曲院歌扇樓船客攜烏帽詞寫紅牋公時  
最樂一飲千年幡然倦游歸與十笏自傳西樵高致突  
兀生埋草堂歿留石碣豈同溪源書空咄咄慈親勸駕  
天子賜環久返野服重點朝班桂蠹愈辣松柏寧寒  
直道再黜還我東山白雲悠悠子舍將老何期北堂忽  
隕護草孺子之泣銜恤如擣雞骨支牀鳬鳬遂杳嗚呼  
哀哉公在倚廬如依母膝號動几筵血漬枕席告母三  
篇情辭悽惻地下相從死孝罔極嗚呼哀哉聞公易簀  
口吐妙香梅檀蓮華竟體芬芳豈辭東堂而往西方衆

香國去三車翱翔論公學問首定經史十二爲表十三  
爲裏其辨詩傳亦裨四始燃脂集成形管備矣讀公文  
章古風洋洋絕妙好辭花間草堂八分程邈正體歐陽  
惜乎絕筆大雅云亡位不副才年不酬德浮生有涯令  
名無斂節以一孝孝思維則婁康禽惠贖世齊式僕忝  
石交明冥異路千里屋梁三年尺素笑貌如存琴樽非  
故何日驅車哭君丘墓嗚呼哀哉

陳孺人諱

有序

康熙十有九年十二月六日吾友陳其年太史夫人儲  
氏以疾卒于家明年正月訃至京太史爲位邸次哭之

勸凡同人之在長安者無不弔也嗚呼哀哉玉臺邈矣  
總帳淒然溝中之水俄分陌上之桑長罷天寒日暮惟  
存補屋之蘿月落烏啼空望添薪之樹漢宮禰翟已斷  
香車吳苑機絲并虛錦字蒿簪藜杖鹿門之偕隱無期  
鈿盒金釵鴛閣之留貽尚在太史思深琴瑟痛絕糟糠  
不堪貧賤夫妻遂作死生離別登舟掩袂誰償沽酒之  
錢開篋沾襟還認簪花之筆金閨割肉轉憶細君玉局  
修書寧憐麗豎以予同病及爾齊年黃門之白首相傷  
司馬之青衫並濕埋香葬玉多天邊不返之魂別鶴離  
鴻盡人間可哀之曲嗟乎江文通之賦恨人不堪聞衛



叔寶之言愁僕何能已爰摭挽唱用闡幽芳匪獨文生  
于情庶幾言稱其德云爾詠曰

銅官山畔罨畫溪隈有一君子于思于思沉吟草閣跌  
宕琴臺婉孌疇匹女士而才少保門庭太丘家世處士  
盛名黨人遺議出有輜軒居無委積百畝汗萊我耕子  
織膏薌飴蜜以奉尊章帷帟環帶以辦姻喪倉箱鈎較  
庖醢排當惠于臧獲問及牛羊何有何無同心黽勉惟  
髻親操羅襦數典宛轉盤匱綢繆箴管夫子何爲擁書  
一卷良璧不剖駿馬誰羣紅顏多怨白眼常瞋牛衣慰  
藉賴有閨人將子無怒士豈長貧有酒酤汝有餽餽汝

杏之落矣拾而啖汝君學書乎進以墨簿君學奕乎授  
以碁譜維子歸休抱子衾裯維子遨遊送子方舟手攜  
南浦目斷西樓紅綃染淚翠黛生愁君本才人烏絲解  
賦婦亦能歌唐人絕句楊柳春風梧桐秋雨每寫迴文  
空傳尺素前年鳳尾飛下長安賀君待詔果得窮官  
願言則噫努力加餐刻期剪燭共話團圓何以報之錦  
衣玉笋何以迓之香車寶馬迢遞京華徘徊桑野不見  
三年何其久也悲莫悲兮垂老別離怨復怨兮遠道相  
思子歸無日我往無時明冥異路已矣長辭嗚呼哀哉  
疇昔之辰值君吉誕脫我半臂爲更斗麴遙祝長年且

安薄宦毋念亡人珍重千萬更有囑者盍聘諸姬石麟  
玉燕早育佳兒鬼猶求食寧憂餒而君聞斯語淚下綆  
縻使者方來重封画匣髣髴太真釵分鈿合可借營齋  
還留贈訣睹物思人肝腸斷絕嗚呼哀哉古人有言仇  
儷實重湘水啼鵑秦樓泣鳳彈破繁絃驚回噩夢感子  
新喪觸予舊痛我思夫人允稱女師冀畦比範梁案方  
儀徽音足永泡影奚悲敢書彤管式表素旗嗚呼哀哉

哀辭一首

吳少君哀辭

有序

漢家太史爰偶清娛晉室將軍嘗求絳秀蓋有東方之

藝可配小妻亦惟南國之風斯稱季女豈如櫻桃楊柳  
僅綰雙鬟椽燭踰糜空貽半臂已哉吾友周君如姬吳  
氏生在鳴琴之里于歸顧曲之家問侍兒之小名視夫  
人爲同姓終溫且惠若戴仲之齊姜美秀而文比趙姬  
之下隗雖列少君之位實備大家之儀施小艣以奉尊  
章御雜佩而贈君子衾裯是肅鎖鑰咸宜兼之德著房  
中風餘林下葺先人之三徑松菊長存鞠孺子之單門  
琴書不墜衣履皆得其任婢僕盡歎其賢旣而昌黎游  
宦祇挈柳枝子敬居官恒偕桃葉扁舟來往時停泰岱  
之雲客舍逢迎並坐燕臺之月金門索米每佐晨炊玉

局紬書相依夜讀擁髻而稱慈母披帷以教嬌兒桃花  
頽面不廢恩勤柏葉丸熊俾資辛苦甫及戲鳩之歲卽  
成舞象之材而氏性厭鉛華躬親操作頃筐采菽惟辦  
長齋纖手縫裳猶藏短篋但切寧馨之愛不留阿堵之  
遺夫何二豎告災三尸助虐紅顏憔悴難尋補骨之脂  
翠黛消磨莫乞返魂之藥牀前夫婿執手流連膝下孤  
雛牽衣泣涕宛其死矣傷如之何嗟乎玉臺永逝金屋  
無歸天河七夕惜破鏡之空飛京洛三年痛遺簪之不  
返周公瑾神傷已甚吳綵鸞仙去何之僕本恨人君誠  
凶事相逢掩袂共懷香澤之思獨寤沾襟誰寄蘅蕪之

夢驪駒將唱薤露重叩感此百哀續爲三疊

秋風起今天氣涼燕山鬱鬱兮易水湯湯金門有客兮  
懷故鄉嗟美人兮息假在牀一朝永訣兮泣數行良人  
斷絕兮愛子徬徨白日迅速兮夜何長仰視雲漢兮月  
亦有光牽牛織女兮正相望美人一去兮隔河梁  
秋風高兮雁南飛白露泠泠兮青草稀征夫夙駕兮竭  
而歸嗟美人兮悵何依素輻徘徊兮丹旆遲渡黃河兮  
風汨之江流日夜兮客心以悲棹歌發兮挽歌隨剪紙  
招招兮復靈衣覓歸來兮逝無違

覓兮覓兮天一涯乘風窈窕兮歸其家虞山朝雲兮吾

谷暮霞故園無恙兮菊有黃華開画閣兮綠牕紗金鳧  
席角兮鐵馬簷牙弄脂墨兮訴琵琶願夫君兮上京華  
攜公子兮同金車我所思兮副笄六珈竚鸞書兮玉鈎  
斜

祭文 十一首

祭陸處實文

嗚呼昔人有言死生亦大矣豈不痛哉夫苟齊死生爲  
一致則莫壽于殤子而彭祖爲夭莫吉于溝壑而牖下  
爲凶若論其恒則必臻太公之耄躋武公之耄錫文王  
之九齡而後可謂之生又必曳夫子之杖易曾子之簣

示如來之涅槃而後可謂之死然而天道固有不可知  
人事亦有無可奈何者古之人以比干之忠焉而死申  
生之孝焉而死伯夷之仁焉而死季路之勇焉而死尾  
生之信焉而死屈平之才焉而死彼豈惡生而樂死哉  
時有所窮勢有所激謀有所不逮數有所不測疑有天  
焉莫爲而爲非人之所可知或者人自爲之卽天亦有  
無可奈何者斯則吾之所大痛也而未有痛于君之死  
者孟子曰可以死可以無死何以別之愚夫愚婦知昏  
菽麥可以死者也而君讀書能文名在天下則可以無  
死老生寒士日暮途窮可以死者也而君少年巍科出



身仕籍則可以無死鰥寡孤獨顛連無告可以死者也  
而君妻子團圞室家靜好則可以無死所爲君不足者  
不過曰貧耳罷官耳遭橫逆耳夫使貧而宜死則黔婁  
原憲宜死久矣罷官宜死則柳下惠卿宜死久矣遭橫  
逆宜死則姜里陳蔡宜死久矣然而古之人安于義命  
之常而君粹當其變豈有幸不幸耶其果窮于時激于  
勢短于謀拙于數而爲此一決之舉耶其或達于生寄  
死歸之理附贅縣疣之喻學道家之尸解同佛氏之坐  
脫遺形骸而游冥漠耶由前之說則吾所不能解由後  
之說則吾所不敢知也惟是君可以無死而更有不可

死者君學富矣而家屢空登第矣而官獨冷有子才矣  
尚未抱孫產業蕭然婚嫁未畢忽然長往目雖瞑能無  
疚于心乎至弟之與君旣爲中表申以昏姻總角之交  
相期白首疇昔四子結社靡間晨夕靈長蘭謝卿謀玉  
折僅存吾兩人耳今君復先我去人琴俱亡形影相弔  
以此思痛痛可知矣神覓荒亂敘次無文生平酒盃頓  
盡于此君其飲斯亦首肯予言否也嗚呼哀哉

祭章素文文

嗚呼士之遇不遇豈非命耶其遇者童子操觚驟掇高  
第其不遇者浮沉塲屋爲老師宿儒泊乎晚節僅獲一

命而終于無祿良可悲也嗚呼予于吾友素文之歿而  
不禁悲之甚也予年十八始出交友以漸識天下之士  
然總角同好不過數人數人中或中道夭折者無論其  
他諸子多後先捷去登仕籍有致身卿相者卽最不肖  
如僕亦嘗備朝廷之末吏盛名之下賦士不遇者獨素  
文耳素文試于南不遇旣試于北又不遇或遇矣誤中  
副車仍不遇嘗一應詔試中書舍人名已上復阻于  
格旅食長安者八年始以教習考授知縣稱官人歸里  
予迎謂之曰君無薄縣令百里大足有爲着朱騎馬黃  
紬被中放衙窮措大亦榮矣且大夫人年高捧檄而出

上以養親下并飽其妻子毋久鬱鬱爲也素文慷慨多大志夷然若不屑者曰吾背城而借一戰子姑俟之嗚呼孰意麻衣至公已不及待卽爲五斗米折腰亦不可得何其命之窮也素文一生殫精竭力惟結社選文二事少與予輩會滄浪亭首執牛耳中間號召四方同軌畢至雖黃池爭長吳晉匹敵而壇坫之間羣奉章先生爲項領其門弟子亦日進矣至于時藝自運旣工所選清音許點精確價重雞林故坊人尊選政者亦必曰章先生云嗟乎世之馳驚功名者憑藉交遊之力稍一援手立致雲霄其文之佳惡未可知而選刻一編借爲羔

鴈以致譽于公卿間二者誠仕宦之捷徑也以素文結社之廣選文之盛而終身不得其尺寸之助何與此非爲之者不工殆有命焉不可強而致也說者謂天之命物予其角者去其齒絀于位者必長千年而君夙有寒疾每喘發輒廢寢食委頓幾殆一旦蹶起則飲啖嘻笑如常時邇年一醫投以金石之藥予嘗以昌黎服散書規之然君自謂一時良快要其腴削元氣或由乎此君生而美風姿有璧人之目今年五十有五少予一歲予顏色憔悴二毛斑然而君修飾皎好如三十許人生平曠達饒興致每同人宴會堅坐泥飲鷄三號不肯休兼

多兒女情遇柔聲曼色不能自持時一中之數者于相  
皆無死法而揆之養生之道十無一二焉此君所以死  
也然亦莫非命矣說者又謂素文雖不貴名在天下雖  
無中壽視同學故人靈長卿謀曾不得三十者已過半  
矣庸何悲而吾之悲素文者生未能祿養其親歿而尚  
未葬焉家無負郭之田室人幾不給餽粥大兒忠可小  
兒孝可並負妙才未及見其騰達皆君遺恨心不忘者  
其遂瞑目而去耶此吾所以重爲素文悲也數年以來  
予與君踪跡雖疎心期罔間塊然獨坐追念舊遊昔人  
所言一處所一物候一日一夕一觴一飯顯顯然無有

忘弃者思之腹痛故不忍言言之亦不能盡也聊述數語以侑靈牀盃酒而已

祭計甫草文

嗚呼歲在龍蛇運丁九六風塵瀕洞江山翻覆天喪斯文人嗟無祿祭酒梅村尚書芝麓櫟下元亮廣平玉叔金沙蔣大新城王六赫赫諸公並登鬼錄哀哉計子亦罹斯酷維子挺生吳江一曲八股早工五車能讀有詩千首有文百軸望古遙集邁焉絕俗策名賢書馳譽京輶命與仇謀壯與脫輟餬口四方風雨彳亍周游晚歸著書盈篋公卿斂衽弟子削牘疇昔雞壇紛紜洛蜀子

爲君宗標榜，睂目意氣飛揚疾。惡如毒雄辨懸河，四筵  
驚伏衆人搖唇。先生捧腹大笑，燕雀安知鴻鵠。吾道干  
城豈同碌碌，嘗從使車漁陽上谷。至右北平訪我宦躅，  
周詢父老口碑。不辱觀我題壁，喜笑頓足歸來慰藉。把  
酒相屬，此意千古知己敦篤。白首方新天奪，何速子素  
知醫問難精熟。何期妖豎暗中傷鏃，百鍊金刀化爲槁  
木。文星晝隕，書鬼夜哭。一召玉樓，永辭茅屋。彩筆凋零，  
遺編斷續。寂寞門牆，淒涼骨肉。老母年高，佳兒孤獨。枵  
有懸鶉，瓶無儲粟。十口何依，百身莫贖。天道冥茫，人生  
刺促。塞翁失馬，樵夫得鹿。莊子夢蝶，賈生對鵬。苦樂循



環吉凶倚伏勘破本來萬古一宿人壽幾何徒勞僕僕  
烈士殉名空爭蠻觸歸休乎君不遠之復死而有知納  
我忠告豈惟弔爾生芻一束

祭徐太夫人文

嗚呼賢哉太母聖善肇基金相並質星光月儀生爲虎  
頭將軍之女嬪作南州高士之妻其奉先人也有采蘋  
采藻之美其輔君子也有鼓瑟鼓琴之宜其勤儉克家  
有葛覃卷耳之德其平均逮下有鳴鳩螽斯之慈其扶  
衰濟蹇有東山霖雨之辛苦其席豐履盛有卷阿飄風  
之深思其先憂後樂者如大臣以安社稷爲悅其內健

外順者乃吾儒之主至善爲師蓋以桓少君之節操兼  
曹大家之文辭辛憲英之識鑒合李絡秀之操持故能  
入總綱紀出定危疑處患難而勿改其度享安樂而不  
失其馳若其一經示訓百史貽規樹三珠于庭下弋五  
雲于天垂鼎立爲萬夫之望泰交而一人是毗鸞  
書玉軸之屢降翠節蜺旌之紛披子孫奏斑衣之舞賓  
客獻燕喜之卮天下以爲景星慶雲之間出琪花瑤草  
之交輝而太夫人溫恭有恪淡泊無爲証念佛之三昧  
恒精修而博施悟榮華之泡影遂脫屣以西歸且吾見  
其拈花微笑又何薤露之堪悲惟是侗交徐氏者三世

于茲奉贈公以周旋仰阿母之音徽旣與伯仲敦千秋  
之好重以叔子忝一日之知祝萬年之眉壽問八座之  
起居方當是則是傲曷爲靡瞻靡依此固朝野之所同  
哀共歎况愚父子能不涕泗之沾衣太夫人聞之得無  
曰夫夫也爲達于道者殆未見我杜德者機也嗚呼尚  
饗

祭王文貞公文

嗚呼國重老成鄉稱通德天生哲人爲世法則大哉夫  
子間氣挺出鳳閣傳家青箱遙集漁獵丘墳鼓吹經籍  
文雅西京人倫東國遭際興朝承明倬直玉堂視草

金門簪筆彪固齊鑣談遷接軾義獻之名于今猶昔

先皇在御疇咨汝弼命作秩宗寅清密勿一人是毗

四方爲式青宮克保黃閣爰立超然引年懸車杖策

綠野優游三槐手植維大司馬邦之柱石宣力兩朝

文武尹吉濟濟五之蟬聯爵秩烏衣子弟琳琅珠璧先

生顧之云何不懌喬木世臣伊巫榮畢嶠嶠元老作賓

王室三事大夫以引以翼尊爲老更宜言憲乞天下

文章推公巨擘揆藻摘華斐然作述海內君宗龍門百

尺倒屣迎賢常若不及布席論文樂數晨夕三徑怡園

琴樽自適五福旣醉三多兼得景星慶雲長照北極歲

在龍蛇山頽木厄逍遙負杖戰兢易簣全受全歸怛化  
示寂 朝廷震悼昊天不弔喪我一老嗟爾維百中使  
臨筵庶官執紼 御墨淋漓豐碑嶸峩哭塗號春停  
歌息矧予小子久侍几席叩絕撞鐘悲深徹瑟何不百  
年終于七七浮生有涯令名無斁死而不朽光垂史冊  
公其往矣炳如白日尚饗

祭先室曹孺人文

維康熙十七年十月十六日杖期拙夫尤侗在京聞吾  
妻 勅封孺人曹氏于九月十九日病故驚痛幾絕以  
奉 旨候試不得歸乃遣長男珍星夜奔喪滴淚和墨

以一言告奠于吾妻之靈曰嗚呼痛哉吾妻死耶憶汝  
歸我計四十年恍如昨日已隔重泉汝同貧賤汝共患  
難我病汝憂我愁汝勸紙窗伴讀燈火殘機秋風報罷  
淚滿牛衣中間薄宦相隨塞上四載風霜亦無佳况旋  
遭譴謫勉我歸休荒田老屋偕隱優游官橐蕭條家計  
繁瑣數米量鹽累汝辛苦吾父吾母並享高年朝饔夕  
殮賴汝周旋兩遭大故治喪營墓春露秋霜得汝幫助  
兄弟妯娌親戚友朋情文周洽無事不能汝苦多產兩  
男三女愛子情深躬自哺乳男婚女嫁六禮牽連鬻釵  
典襖十指幾穿解衣衣我推食食我何有何無交謫亦

可我嘗乞食南北東西拋汝獨處形影淒其喜我入門  
醞酒夜話問我幾時山間林下蒿簪藜杖佛地唱隨此  
志不遂愁鎖雙眉雖邀 貤封性愛朴素那有冠帔依  
然荆布一經教讀望子成名珍雖鄉薦瑞尚諸生我無  
宦情卿知我者廿載田園豈思金馬今年薦辟吾欲堅  
辭汝反勸我應 詔京師有子公車同行亦好衣裹書  
囊辦裝勞擾執手叮嚀神傷貌悅本謂暫離誰知永訣  
汝素善病最苦箭風消摩無效九散難攻時發時止貞  
疾不死何意此番沉綿不起云是蠱脹宜用參朮氣血  
久虛如水投石大兒北上小兒南游無人嘗藥浸致彌

留誰拊棺木誰唸貝玉望夫思子汝豈瞑目汝定恨予  
予實負汝生守空牀歿殯虛廡我一聞訃涕泣沾衣身  
無羽翼不能奮飛請急不可告病不可君命難違功  
名誤我遣子奔喪登車哭別父北子南肝腸斷絕明年  
事竣火急歸家吾今老矣相見非遐我作此文竟與俱  
去萬怨千悲難盡一語珍可奠酒瑞可讀辭千里一慟  
汝細聽之嗚呼痛哉尚饗

七終再祭亡室文

嗚呼今日何日吾妻七七之期終矣正值小至故吾就  
寺禮懺并以麥飯奠汝吾自聞訃以至今日血淚未乾



前廿二日送大兒歸去臨岐哭別哀感路人彭親家念  
我孤寂接往同住日中不敢哭泣惟夜間淚滴枕衾耳  
吾輾轉追思以汝修德宜享長年且五行命相俱無死  
法祇因氣血勞傷積成痼疾若得良藥扶持可延歲月  
乃誤信箭風指捻鍼挑輕服丹方日朞月削復變蠱脹  
遂致危篤耳昨通州人至始見八月廿二日信瑞兒云  
兒出門時母病小愈兒再四叮囑勿信箭風用草頭迅  
厲之藥不意考回細問竟投猛劑元氣大傷今雖遍請  
名醫連進參朮已恨遲矣此因吾與兩兒皆不在家汝  
無定見差跌至此大兒淡悔北上幾不欲生小兒亦悔

白下之行恨不能以身代也大兒勺水不入雞骨支牀  
遠道綿綿寒氷朔雪吾心牽掛如何可言望汝陰靈默  
護令早歸家兄弟二人守汝空幕如我在側倘有遺言  
可于夢中示之吾衰年多病萬念俱灰豈有功名之戀  
惟乞 君恩放歸田里買山頭尺土葬汝骸骨築室三  
間棲身伴汝以待同穴吾事畢矣今日者都門諸老先  
生百餘人同舉諸公不下百人同鄉親友數十人皆來  
赴弔爲文祭汝吾旣德薄汝又命蹇何以堪此亦藉爲  
九泉光寵而已吾今哭汝汝或聞之聞與不聞吾不知  
也汝若哭我我又何從知之三千餘里音問隔絕况明

冥異路哉韓昌黎云一在天之涯一在地之角傷哉痛哉

哭瑞兒文

維康熙十九年六月十九日吾兒瑞以病卒于家至七月十七日珍兒以訃音至汝父聞之一慟幾絕旣守職不得歸越五日乃遣人回以酒飯奠汝勉敘一言告于吾兒之靈曰嗚呼痛哉兒何死也兒生二十八年今思之猶昨日也兒于癸巳八月十八日生永平官舍故小名阿永吾雖薄宦自郡太守副將軍下至州縣鎮衛官吏皆持羊酒賀司理得子其諸生耆老辦香叩墀下者

相屬也家人竊語是兒有福兒生而姣好睂目如畫最爲汝母鍾愛親自懷抱不忍付乳媼手四歲歸里瑤環彩衣跳走堂戶間親友見者戲呼爲永平人兒輒綿蠻相與問答人皆謂予此非常兒稍長入塾肩隨兄後汝謹厚勤學不及兄而穎敏剛決直排乃兄上之汝祖嘗言珍也文瑞也其武乎兒愠甚益刻礪讀書稍稍能文矣旣補弟子員兩試秋闈矣乙卯汝兄登賢書報至汝卽憤懣拒戶不見客日下帷揣摩然至戊午猶未售也吾爲汝少聘蔣氏未嫁而殤娶鄭氏甫期而歿再娶金氏五年矣生一女尚未有子也計汝父母爲汝撫育爲

汝教誨爲汝家室者心已盡矣力已殫矣何汝生之福而  
死之促貌之淑而命之酷才有餘而年不足耶前歲  
六月吾應

詔北上大兒同行留汝在家侍母豈料行五日而母病  
汝朝則問卜晝則迎醫夜則拜天露禱請以身代奉侍  
湯藥衣不解帶卽母亦歎是兒孝善事我金陵鄉試兒  
不欲行母以小愈強之試畢馳歸而母病已不起屬續  
之際汝呼號奔走浴衣拭髮哈熬附身之具纖悉拮据  
汝以一孺子驟丁大故其驚惶急迫悲哀勞苦艱辛萬  
狀畢萃一時是兒嘔出心血所以傷生殞命或由于此

汝兄奔喪回相持擗踊匍匐苦次稽顙賓客之前未嘗  
愆于禮也又念吾羈棲京邸徬徨戀慕每發家書汝兄  
弟各緘一紙敘述酸楚寄貽周匝吾雖揮淚亦爲色喜  
汝素得母憐惜而畏吾嚴然汝愛父母之心一也何竟  
棄我而從汝母遊耶使汝果與汝母九泉相聚吾復何  
憾然而冥冥之中不可問矣吾出門在六月十一日汝  
母送我于屏汝送我于關皆歡然無恙也四月而汝母  
亡二年而汝歿一朝分手永無見期嗚呼痛哉然汝母  
善病吾固憂之猶伏枕者三月汝素彊健不虞其病何  
况死何况七日而死也汝母病箭風汝亦病箭風箭風

何物既殺其母又殺其子豈一氣所鍾與然汝兄述病甚詳又甚雜問之諸醫究不知爲何症也更可怪者病至七日危矣篤矣而汝尚不自知汝兄問身子好否曰好在問痛否曰無問有鬼乎則曰何所不有惟索湯沐浴誦大悲呪一遍斗母呪數遍并令衆人誦呪呪聲未畢端坐而逝嗚呼痛哉當是時汝父在京不之問也汝母在殯不之顧也汝兄在側不之訣也汝婦在帷呱呱者在抱無一言之囑也汝爲有知耶無知耶謂汝有知豈有病而不知痛死而不知悲有鬼而不知怖畏者乎謂汝無知何以語言了了容色怡然猶知沐浴之潔其

身呪誦之持其口也以爲矯情鎮物恐汝未必然以爲  
達天觀化恐汝未能及此也吾安得呼汝而問之哉吾  
細思汝五行命相皆無死法爲人直道無他腸閉戶讀  
書不與一事不交一人咕嗶之餘焚香禮佛晏坐而已  
有何作孽受此短折之報此必吾一生多過獲罪于天  
然何不降罰于身而貽累于子仰視蒼蒼曷其有極吾  
初聞訃神鬼駭散掐指出血肝腸寸斷急欲掛冠而歸  
哭汝靈牀以銷永訣之恨有告我者曰禮子無奔喪之  
文前不奔爾婦而今奔爾子乎有

君命在若之何以私出也又有告我者曰夫歸一也榮



歸爲上休歸猶可今以喪歸千里入門雙棺在目惟有仰天大叫捨于地而已矣是無益于死有害于生也而珍兒書亦曰他日者兒將北矣而父又南是吾父子終不相見也盍少淹留以待兒來乎故吾之前却不歸者萬不得已也若謂我戀功名而忘天性以鰥寡孤獨之身廁公卿大夫之列是非貪則忍義之所不敢出也人生至此雖三公不願况微官鷄肋乎倘得從諸君子後盡修史之職以報

天子之命俟珍兒公車扶藹南還買一坏土葬汝于汝母之傍從此披髮入山不復問人間世事矣至于汝有

寡婦當養有孤女當嫁汝無子當待長房次子立後以  
延小宗此皆汝兄事也汝可無慮吾亦不能代汝早計  
矣吾年過六十與死爲鄰汝不哭我而我哭汝昌黎所  
謂少者沒而長者存顛倒莫甚焉逋翁詩云老人喪愛  
子日暮泣成血老人年七十不作多時別吾又惡知吾  
生幾何而顧爲汝抱無已之悲耶嗚呼痛哉

祭二兄五弟文

康熙十九年六月二十七日五弟伊士以病卒于家予  
聞訃時先有瑞兒之喪同爲位哭之至十月初五日介  
人二兄復病歿予痛中思痛痛又甚焉因姪自英奔喪

歸勉敘一言以卮酒告于二兄五弟之靈曰嗚呼哀哉  
昔我父母有子七人長幼雖異親愛惟均入而肄業連  
牀共被出而應試同舟並騎歲時伏臘聚首庭除後雖  
析箸中實同居父母俱存兄弟無故每誦斯言食貧欣  
慕天倫自備人事常乖離多會少樂往悲來諸子讀書  
窮年未遇吾爲娛親捧檄而去泊歸林下偕奉高堂傷  
哉萱謝恫矣椿亡無父何怙無母何恃哀哀我泣血  
相視大兄素壯未濟而終羣龍無首變六成凶五弟清  
修艾甫踰二鉛槧方攻巾匱忽墜二兄篤學屢躋科名  
春秋六七亦乏遐齡兄及弟矣永相失矣我之懷矣

其泣矣前年喪婦涕泗淋浪今年喪子斷絕肝腸天下  
窮民老而無告我罪伊何昊天不弔予滯京師六弟在  
黥生本同根沒乃分枝昔何團圞今何零落笑語依稀  
音容冥漠兄雖有子尚未弄孫弟更單弱嗣息僅存死  
而有知銜恨何已顧念生者此心如死昔送吾子朔風  
淒淒今送吾姪雨雪霏霏載哭載奔歸告靈寃投筆鳴  
咽餘復何言父兮母兮悠悠長夜倘聽兒言能無淚下  
嗚呼哀哉尚饗

公祭陳其年檢討文

嗚呼自古才人造物所忌文章九命真堪流涕人生缺

陷萬事難遂使斯人死空存吾輩大江之南荆山之內  
陽羨書生穎川苗裔少保勲業巍然門地處士聲名卓  
然標幟晚得小同幼稱阿士白眉最良紫髯亦異好讀  
秘書能識奇字作爲詩文洗洋自恣合組列錦驚艷絕  
麗鴻筆之人海內寡二曷爲塲屋屢蹶秋試豈其過高  
未工時藝君乃浩然不可一世結客少年方舟聯騎遨  
遊吳門鷄壇執解適館雉臯跌宕聲伎竭登燕臺上京  
高視流寓商丘黃河旋濟周游晚歸風雨不蔽老屋荒  
田頽然獨寐前歲詔書闢門大會章滿公車陳蕃名  
最獻賦長楊授官中秘天子門生足當一第史局紬

書春秋諮議落拓平生差強人意曼倩飢驅長卿渴睡  
索米求漿亦無佳味重以悼亡淒絕伉儷孫楚情深荀  
粲貌悴弓冶猶虛中匱孰侍逆旅空牀子然小婢對月  
長吁臨風如醉憂能傷人病乃隨至茆苜未采伯牛爲  
厲附贅懸疣逡巡決潰再厄河魚溘焉永逝已矣悲夫  
斯文忽墜豈無他人鐘鳴鼎食君獨蕭條斗筭不繼雖  
有微官送窮無計豈無他人黃耆台背君獨沉綿二豎  
作祟髣髴如戟不及中歲豈無他人瑤環瑜珥君獨孤  
單中郎乏嗣誰其嗣之白家阿寄凡此三者天之所棄  
命也如何莫致而致然有一焉不朽盛事詩曰湖海元

龍豪氣文曰迦陵徐庾藻繪詞曰烏絲辛蘇姿制美矣  
善矣諸好皆備萬丈光芒藏之在笥天雨鬼哭奪君而  
去君亦慷慨仰顙上帝帝曰試哉命爲仙吏玉樓賦成  
鈞天宴賜於傳有之斯言非戲而我故人空然垂淚惜  
君奇才恨無人替歎君數奇歿身齋志感君素交芝蘭  
雅契義爲友朋情猶兄弟我絳子佩一朝分袂明冥異  
路如何勿思敢製公誄以待私謚一束生芻招魂而祭  
言之長矣君其聽未嗚呼尚饗

祭陸親母文

嗚呼夫人之系出自瑯琊乃翁心古繫我通家于歸陸

氏芝庭進士與我中表兄及弟矣朋友之好申以婚姻  
我有次、以字益孫兩家密邇往來朝夕無小無大相  
通聲息稔知夫人事親克孝逮奉舅姑承歡色笑善相  
君子藥食扶持斷機勸讀策名兩闈司鐸宛陵首蓂亦  
飽歸臥田園縞綦亦好宦雖不達喜有佳兒以教以育  
式穀似之哀哉士龍暴亡慘酷孤寡伶仃室家不足飲  
檠茹荼形影相倚否極泰來必復其始卯辰再捷無限  
悲歡京華捧檄依舊儒官絳帳池陽板輿侍側維時壽  
母正年六十長筵戲綵薄養晨昏量移國子將適金門  
何意沉疴莫醫莫禱一夜嚴霜驚摧萱草子哭其母婦



哭其姑闔門婢僕悽愴號呼訃至長安予亦一慟匪母  
之悲故妻是痛昔者吾女歲時歸寧每稱阿母林下風  
清餅餌饋遺互相勞苦如覩其容如聞其語吾妻欣慕  
頗得交懽庶掃蓬室樽酒盤桓或接藍輿或聯画舸問  
水尋山期期未果忽焉分手夢斷音稀娥旣月落婺亦  
星飛妻之亡矣母爲出涕母之亡矣妻其知未生未相  
識死或相從悠悠泉路笑語從容我念故人已嗟宿草  
今弔夫人重傷黃鳥何以慰母形管燐而且有 誥命  
旦暮俟之尚饗

戒賭文

天下之惡莫過于賭牧猪奴戲陶公所怒一擲百萬劉  
毅何苦今有甚焉打馬鬪虎羣居終日一班水滸勢如  
劫盜術比貪賈口哆目張足蹈手舞敗固索然勝亦何  
取約有三費未可枚舉旣卜其晝又卜其夜寢尚未遑  
食且無暇不見日斜寧聞漏下謹叟碎寒袒跣消夏賓  
客長辭琴書都罷是曰費時寸陰難借三人合力以攻  
一樁兵不厭詐敵必用強殺機潛伏詭計深藏左顧右  
盼千思萬量精神恍忽面目焦黃是曰費心終必病狂  
一文半文千貫萬貫錙銖必較泥沙無算贏乃借籌負

或書券家棄田園祖遺寶玩慳者不吝貪者不倦是曰  
費財困窮立見始作偏者公卿大夫退朝休沐讌會相  
娛點籌狎客秉燭監奴問同姬妾角技觀觥平章重事  
豈在是乎亦有儒生厭薄章句博奕猶賢詩書沒趣引  
類呼朋攤錢爭注赤脚無成白頭不遇文鬼誰憐脾神  
莫助富人長者公子王孫珠玉滿室車馬盈門呼盧白  
日喝采黃昏千金忽散一畝無存墻間乞食泉下埋冤  
至如商旅間關萬里競利錐刀窺窬倍屣火伴誘人牙  
行弄鬼囊破吳山身漂越水夢斷嬌妻饑啼稚子其下  
市人肩挑步販體少完衣廚無宿飯脫帽遶牀投馬翻

案登場醉飽出門逃竄賣兒鬻女盡供撒漫最恨奴僕  
全無心肝煖衣飽食游手好閒酒肴偷釀房戶牢關忙  
中作耍背後藏奸狐羣狗黨非賭不歡故賭雖百族惡  
實一類天理已絕人事復廢蓋以大減小者不仁以私  
害公者不義式號式呼者無禮僂得僂失者非智分無  
貴賤四座定位上攀縉紳下接皂隸齒無尊卑一家弗  
忌父子摩肩弟兄殄臂閑無內外男女雜次繙閣拋妻  
青樓挾妓交無親疎惟利是視陌路綢繆故人睚眦四  
端喪矣五倫亡矣身家蕩矣子孫殃矣賭必近盜對面  
作賊戰勝探囊圖窮鑿壁賭必誨淫聚散昏黑艷婦絕

纓變童薦席賭必斃殺弱肉強食老拳毒手性命相逼  
戒之戒之凡戲無益今有貪夫開肆抽頭創立規則供  
給珍羞如張羅網鳥雀來投螭蚌相持漁利兼收更有  
險人合成毒藥躡足附耳暗通線索彼昏不知束手就  
縛旁觀咨嗟當局笑樂人之過也必藉箴規惟耽賭癖  
陽奉陰違父師呵叱妻孥涕洟勇足拒諫巧能飾非貧  
而無怨死且不辭及至悔悟靡有子遺嗚呼哀哉誰爲  
爲之吾聞此風明末最盛曰闖曰獻又曰大順流賊作  
亂其名皆應相公馬弔百老阮姓南渡亡國不祥先識  
聖王在上豈容妖氛敢告司寇宜制嚴刑天罡地煞

大盜餘腥誅不待教有犯必黥火其圖譜殛此頑民聖  
聖人設教君子反經慢遊用傲驕樂當懲人心禽獸何  
去何存借曰未知請視斯文